

如是我聞：一時，佛住波羅(木奈)國仙人住處鹿野苑中。爾時，世尊告諸比丘：「有四法成就，名曰大醫王者，所應王之具、王之分。何等為四？一者善知病，二者善知病源，三者善知病對治，四者善知治病已，當來更不動發。」

云何名良醫善知病？謂良醫善知如是如是種種病，是名良醫善知病。

云何良醫善知病源？謂良醫善知：此病因風起、痰陰起、涎唾起、眾冷起、因現事起、時節起，是名良醫善知病源。

云何良醫善知病對治？謂良醫善知種種病，應塗藥、應吐、應下、應灌鼻、應熏、應取汗，如是比種種對治，是名良醫善知對治。

云何良醫善知治病已，於未來世永不動發？謂良醫善治種種病，令究竟除，於未來世永不復起，是名良醫善知治病，更不動發。

如來應等正覺為大醫王，成就四德，療眾生病，亦復如是。云何為四？謂如來知此是苦聖諦如實知、此是苦集聖諦如實知、此是苦滅聖諦如實知、此是苦滅道跡聖諦如實知。

諸比丘：彼世間良醫，於生根本對治不如實知，老病死憂悲惱苦根本對治不如實知。如來應等正覺為大醫王，於生根本，知對治，如實知，於老病死憂悲惱苦根本對治如實知，是故如來應等正覺名大醫王。」

佛說此經已，諸比丘聞佛所說，歡喜奉行。